

江津縣志卷十四

慈善志

郵惠 明鄭永寬字大亮宏治戊申大旱寬出粟賑貧乏授七品服十七年復旱子越宗泰宗興宗各出粟助賑三人俱例授冠帶邑令王儀扁其堂曰世義堂進士鄒雙山有詩讚

李孟奇字文偉按察副使臨陽之祖值歲饑捐粟賑濟有旨旌表建坊
王朝佑字廷杰太學生邑大旱輸米賑濟賜壽官

涂文煜字光宇家饒好義鄉里賴之天啟間歲旱爲邑人納條糧三萬有奇

清鄆蔭麟字公趾性仁厚好施與邑人王家駒爲之傳

江津縣志

卷十四

慈善

一

傳云戴胤麟字公趾江西豐城人本姓鄆其先祖紹唐遷楚湘潭更姓戴父孚若生胤麟兄弟五人胤麟其四也幼廢儒業年十九母喪二十六入川抵重慶身無資斧艱辛備歷次年至江津中渡營生理間發著以奇勝累致數千金益治產遂爲津邑殷戶比於素封居嘗以利濟人物爲心每鄉黨貧乏無告者罄其有周之無德色嘗置衣衾棺木以濟孤貧遇冬施寒衣歷年靡間會米價騰貴倉有餘石必減價出糶捐社穀若干石置義田呈官永濟孤貧聞有某者貧困將女鬻人以金謝胤麟麟爲轉致女父又有某負債鬻子以償胤麟與贖回一夕竊至胤麟覺呼諭之曰吾不忍獲汝知汝爲食不充汝畱橐吾與汝糧明夜來門外取不可他往恐遇害且敗汝名次夜果來取之後訪知其人終成家

業平生所爲多類此雍正十三年大旱邑令以胤麟有幹濟才委辦倉糧兼理施粥五閱月乃止又嘗委辦協濟江南米五百餘石天性孝友自到川前後遣人迎父與弟姪來津父捐館哀毀盡禮爲季弟及姪婚娶給資本貿易耗折至數百金不以介意各爲買置田業妻李氏克嫻內助子二長天元次聯元援例太學俱恂恂謹飭修業而息克滋大其家年七十一卒署令袁贈以墓誌題曰樂善垂型蓋紀實也後略

劉鐸字振宣邑貢生雍正乙卯大旱捐資施粥乾隆壬申米價騰貴買米平糶乙酉歲歉協辦公濟外復蠲多數錢米前後邑令旌其門

戴克配字靜齋邑貢生好善樂施戊戌大旱辦賑多所保全邑令劉炳爲紀其略子登霄字圖南登奎登俊姪登華孫爲瀚姪孫爲德等於辛酉歲

江津縣志

卷十四

慈善

二

早遭戊戌賑荒辦法共捐巨款全活亦眾邑人王昌年爲之記

劉炳紀略云國家設官分職嚴立課條首重循良凡以爲民也庶司百職有能仰體聖天子子惠元元之至意爲民興一利除一弊者卽崇秩晉爵優獎備至焉余以內貢分符越舊常矢此意爲兢兢奈軍興旁午從役金川雖代篆瀘永兩地而徭役紛繁則催科事迫恤民本意未獲一遂然未嘗不午夜思維鄉里間苟能以仁恕存心代守令者撫恤羣黎是亦官斯土者之所禱祀而求也歲戊戌奉委攝津篆時與都人士接欲陰求此仁恕之士而猝不可得久之或有爲余告曰吾邑中戴君靜齋者仁恕人也動必以正生平未嘗見其情容遽色心地慈良見有窮乏者輒傾橐指困以贈鄉黨間事有不平戴君遇之一言而剖余心

焉識之是歲之秋邑旱甚稻禾之在田畝者不旬日而稿爍殆盡用是饑饉相仍賣妻鬻子流離瑣尾之況輾轉道途又值臺灣不靖邑中常平倉穀碾辦濟江左余日夜究心曾哀章壘上懇畱倉穀萬石奈待哺者眾難於遍給於時戴君倡首樂輸且爲余借箸照邑中保甲處設立賑廠選用公直士庶爲首勸捐一時輸將踴躍飢民賴以復蘇者戴君之力居多事竟余以賑濟之條及闔邑慨捐數目上呈大憲嘉獎余益信曩日仁恕之言不虛爲之略序顛末以示來者 王昌年記云古者以三十年之通制國用則天下無飢民而周官司徒以荒政聚萬民遺人以委積待凶荒又未嘗不預爲籌備也自漢以來災旱愈多救之法亦屢變如發廩移民平糶設糜諸政皆是也東萊呂氏歷論救荒之策

江津縣志

卷十四

慈善

三

而以設糜爲最下謂窮民就食或至失業及釀疾疫故也然衛之文子齊之黔敖皆因歲饑而爲粥以待餓者在春秋時已然蓋仁人君子目擊時艱不忍坐視而思有以救之亦在其用之何如耳吾蜀自嘉慶元年達匪跳梁以來屢歲不登至五年庚申秋收彌歉殍死者枕藉道路遺孩棄女所在皆是也邑侯林公勸募紳耆士庶隨在設賑以救時杜里圖南戴君方以內艱哀毀苦次聞之謂弟姪等曰昔在戊戌天旱先府君倡首捐賑全活多人至今人咸道之吾儕曷可以不繼先志因卽自捐數千金弟姪三人各捐千金又勸募鄰族親友復得千金焉乃於附近眞武場設立粥廠收養乏食待斃之小兒四百餘人日給粥二餐其男婦強健尙可僱力者日給粥一餐計千有餘人其他有業可執而

歉於一時者每月大口助大升米三升小口升半如是者亦不下千百餘人病者醫藥死者收而掩埋之自去歲十一月始至今歲之七月方罷戴君能因事措施處之各盡其方使人受賑濟之益而不蹈其害全活者又數千人昔宋仁宗慶歷八年河北京東大饑時富鄭公弼在青州勸民出粟益以官廩隨所在貯之以賑飢者立法簡便而無害凡活五十餘萬口鄭公嘗舉以語人謂爲生平樂事然公節度一州其權足以徵發倉廩假貸豪富辦此猶爲易易乃戴君方間處鄉里能不惜多金復善勸募遂隨地見功暗與古合使出而當鄭公之位吾知其必不使古人專美於前也吾嘗觀自古迄今有大德者必獲厚報雖爲德者夫寧計此而理固莫與易也又況父作子述之善善相承耶夫善人國

江津縣志

卷十四

慈善

四

之紀也戴君方馳驅王路且以行之家者見諸政事焉則蒙其澤者豈獨方隅下里也哉予更拭目俟之矣今將同事諸君及捐金之目並刻於石以爲後來者勸

曹錫祖邑貢生好善樂施乙酉歲饑捐米賑濟減價出糶其子震魁等亦能體父志

彭啟士邑監生好善乾隆戊戌大旱明年己亥春米貴捐米賑甲內飢民全活甚眾

王心一王心豫性喜施與嘉慶丁巳庚申乙丑連年旱心一捐粟賑濟全活無算心豫亦約同里捐粟賑濟多所保全其他善舉尙多云

楊爲城熱心公益詳人物志平日周濟貧乏收養遺孩拯救災害輒捐巨

金無吝色

江夢花字馥莊增貢生值歲饑嘗獨力備粥溥濟一方飢民餘如鑿龍門險灘設爬巖義渡修半月溪橋人皆稱之

袁周鼎乾嘉間人每遇偏災早潦捐款助賑教匪之亂被難區至人相食亦賴貸金賑恤秩序漸復上峯題贈溥濟一方匾額

江夢奎值嘉慶丁卯大旱羅壩閉糴多日卽運米入減價以濟復勸富家出穀平糶全活甚眾一日舟赴游溪有陸氏乏食擲小兒於江急命人拯起攜歸爲撫成遣還之又嘗收養孤老男女十餘人俾終其年餘詳人物志

鄔毓培詳人物志嘉慶辛酉及癸酉歲屢饑出穀平糶復於雙龍場設粥

江津縣志

卷十四

慈善

五

廠全活甚眾邑令贈仁人利溥匾額

李廷德慷慨好義矜孤寡給寒衣捨藥施茶歲歉平糶諸義舉嘗爲之不惜貲財不求感應

楊年淇性喜周濟嘉慶初歲歉出粟賑飢生活者無算

程煒煌字廷輝同治壬戌髮匪分竄所至焚殺邑人遷避廷輝亦以金買巨舟尾艙載家眷中艙賃劉某僱舵工王太富及水手多人爲避匪計一日舟次蘿蔔場匪大至稿子場一帶居民倉猝走麇集對岸大塘河者約萬人爭北渡時小舟十餘居奇蕩漾中流故昂其值每人數百或千餘不等稍吝則掉頭不之顧自辰至申得渡者未及三之一男女雜沓進退不能勢險甚無知者又譁言匪至一時搶地籲天聲不忍聞秩序大亂而小

舟值昂如故廷輝謂太富等曰日已暮尙不得渡若猶坐視匪至必無噍類匪不至今夜宿何所盍以此舟渡之皆曰諾乃請之劉某允移家屬於岸搭篷暫住又商得團保同意移舟至南岸若輩蜂擁援而上他弗計老弱者仍呼不已乃命巡丁鳴金告曰岸上人今夜早遲本舟擔負完全北渡之責但當魚貫而入免遭覆溺眾心始定每渡輒數百人有杜四麻子者其舟較小廷輝力憊憊之得兩舟次第推移南岸人竟全出險厥後廷輝後裔繁衍殆此事貽之報歟

曹明德太學生好施與每年終散給貧民食米熱甚施茶疫盛施藥尤喜印送善書廣行勸導蓋一鄉之善士也

劉清傑字輔臣庠生白沙鎮人光緒二十二年米值昂貧民乏食輔臣倡

江津縣志

卷十四

慈善

六

捐賑糶邑令贈樂善好施匾額同時捐款者有劉瑞堂劉席三劉春霖三人

周炳忻好施濟養孤貧五十名各給木牌按月領米歷十餘年無間炳忻歿子旭初能繼志

義渡 游溪渡雍正十三年庠生熊屏藩倡募置業二收作渡用邑人王書升爲之引

引云客歲告假歸里路出磁州過漳河見夾岸木碑號瓦滿百乃知磁人李氏設義渡往來士商不索分文渡夫有妄取者擊瓦爲號予慨然歎曰安得天下盡如是乎夫渡之設所以濟不通便商旅而服其業者卽爲壟斷之求上憲知其然屢加嚴禁舡不許滿載錢不許多索勒爲

成規然錮弊既久改絃甚難蕭條羈栖孰肯牽延時日迂道稟公乎本
縣邑侯時加稽查而瓶酒隻雞卽箝差役之口此正義士所爲拊膺而
長太息也津邑南達黔滇遠通閩粵通衢官道由石燈入津城亂流中
渡三十年前另闢孔道自綦江分途過李市渡游溪路捷百里于是遊
人之往來其間者皆于于然先後相望日以千計又連年他省之搬移
入川者歲以萬計長塗窮旅資斧爲難典衣當物以作渡資而游溪渡
口遂爲蠅頭狗血爭相逐矣友人熊子屏藩慷慨士也輕財好與義氣
逼人然家貧寂寞凡有舉動不能如心爰倡義渡之設有楊子馨宜何
君斐成劉君萬先等極力贊勸嗣是而吳楚閩粵客居游溪者集腋相
助現累百金又舊渡夫彭步月樂施新舡一隻價值二十餘金事乃油
油然將就理焉然猶欲募化同志君子各捐清囊買義田一分以食渡
夫妻孳大舡二隻每日輪流小舡一隻以便小溪一切過客遷移牛馬
豬隻不取分文至其盤詰奸盜稽查禁物較前更謹仍呈邑侯詳上憲
刻碑註冊永垂久遠噫嘻熊子之志可謂善矣不意磁州而外復見盛
舉于此見直道自在人心而公義奮發異地同情則西陲僻壤庶幾與
中土名勝并驅爭先予故感而筆之以爲慕義者勸

五里澄渡乾隆二年王澤永等募置產業成立

渡頭溪渡有打鼓山田業王占一等募置

魚子溝渡附近白沙鎮初由鎮內五顯廟公置渡船一道光年間里人劉
子俊募款添置渡船一咸豐初年劉子俊又添置渡船一其每年整船雇

夫經費俱各有租息章程

星橋渡有土業作費

驢子溪渡設船三有墾坵頭田業一畝地才捐年租十石又劉子俊捐大河邊土業一年租二十貫周姓捐渡口上土業一年租十六貫劉錡捐土業一年租三十貫併作渡用

獅頭河渡距白沙上游四十里舊有渡船一里人卞性成捐金置業又添設渡船一

塘河場渡置業天堂壩年收租息作費

窄口下游暨龜山渡孫陳王三姓合捐置業年租八石分撥兩渡

河口渡有業一年租六石由王爺廟首人經營近雙龍場

江津縣志

卷十四

慈善

八

沙溪渡道光十八年廖會氏孫朝清捐田房四設立

雙溪口渡近龍門場由土主會首人募置產業三鋪房二年收租錢百二十貫作費

大河口渡近龍門場有業二年收租錢一百貫

楊壩溪渡距城四十里有業名古墳溝支給渡夫口食

燕壩渡王心一江夢花劉純一蹇滋善等倡捐勸設共置田土四原收租穀十四石錢十八貫爲整船雇夫之費

聖中溪渡置有蒲草田石腳跡產業二

淞漑渡分上中下三溪置業在江南岸名周家壩

下渡口渡在淞漑對岸里民蹇應元周遐昌募款設立渡夫口食在渡頭

壩義渡田內支給

青草背渡徐常臣等募置田業王慶衍閤族捨出渡夫坐宅山土

高占灘渡初由張金玉等募款置業棗子塆支渡夫船隻道光年間復由邑人諸肇堂捐金置業添設渡船一

寶珠渡邑人王體善陳皮盛等募買眠羊溝產業作費

板橋渡在縣西百二十里乾隆六十年邑人陳詩鍾募買清水塘業作費

石門渡嘉慶十九年邑人卞性成捐設置業年租三十石

周楊溪渡募置有業年租三十餘石由普福寺首人經營

眞武渡共三處一眞武場一羊滿嘴一白漩子戴登霄率弟姪等捐款設立置業花平壩收給三處渡用又捐造渡船四邑令李寶曾爲之記

江津縣志

卷十四

慈善

九

記云津邑南岸山脈發自黔南蜿蟺磅礴挾諸澗之水以匯於江其源自桐梓經南州綦江而來者爲棘溪自仁懷經洪洞青坪而來者爲筍溪其問津處如眞武場羊滿嘴白漩子均係黔蜀往來要路匪特秋霖伏雨非方舟莫濟卽尋常亦不可褰裳涉者往惟壟斷土民駕小舸需索行旅且非時招之不至遇甚漲尤虞覆溺里人靜齋戴公蓋常憂之今嗣君圖南郡伯善承先志率同弟姪諸君共捐金千餘買田業一分取其出爲三處渡夫之費並造大船四隻艤岸以待往來便焉圖南君自先世以來好義行仁凡利人濟物之事踴躍捐貲種種不可枚舉如三義渡亦其一也特爲記之令樹石溪干將田業界畔及他條款統刻

碑陰

仁沱渡民婦袁楊氏倡捐并命子光緒募款置業御史胡大成爲之記
記云津邑南鄉之水出自黔南過碁江經羊滿嘴與筍溪合流匯於仁
沱上有市鎮予友袁君裕齋光緒之居在焉其地山高而水駛新灘積
石橫其下龍蕩衝波噴其上春夏之交波濤洶涌直瀉大江彌漫數里
許行者病之乾隆間裕齋之先君子蘊山公慨然爲義渡倡會公捐館
舍其事遂寢十數年無繼之者公德配楊孺人痛公之沒思代其任因
詔光緒等而命之曰汝父嘗謂存心利物必有所濟故義渡之舉恆諄
諄焉而未遂其志以沒汝曹年尙幼不復記憶予思繼其願未嘗一日
忘也予尙存養膳資四百金其曷持之以竟汝父志光緒等唯唯聽命
以弗克有成是懼爰會集里中竭力捐助獲千餘金置田數十畝入其

江津縣志

卷十四

慈善

十

租爲歷年造船及舟子費以垂久遠而義渡始告厥成焉嗚呼觀於此
可以知義利矣予待罪諫垣竊見我國家築堤堰成津梁凡所以子惠
元元者役費動以億萬計而弗恤窮荒僻壤仕宦不到之區爲時政所
未急而里之登壟斷者遂析及秋毫以陰規其利而爲往來病則茲渡
之成也寧獨爲行旅便將使問津於此者履其地思其義也夫匹夫慕
義何處不勉民之秉彝好是懿德吾因是歎孺人之能成公之志而又
樂諸君之相與以有成也是爲記

德感場渡乾隆三十五年里人張聖兆劉斗山倡義募捐先後共買田業
八鋪房一收租給渡夫用費修渡船十用渡夫二十名渡者便之

梅子口暨青草背渡道光年間里人鄭颺捐設置買產業年租七石又命

子文選捐置田產益租六石分給兩渡縣令郭贈有利濟行人府憲王亦
贈有善施跋涉各匾額

小河壩渡鄭文選捐業勸設

慶灘渡道光二十五年李坤山施渡船一久壞咸豐二年周文臺繼捐里
人王德昌提倡將文昌會底金生息作費

高公渡有三處一在兩岔場口置業大路溝年租八石場基屬之一在清
平場上游七里沙沱子一在黎家店皆邑令高公捐廉勸設故名

石龍渡在兩岔場附近石龍峽置業老窰罐廠玉河溝兩處年共收租四
石里人公推管理之

塘村河渡距兩岔場十里置業名官田

江津縣志

卷十四

慈善

十一

窄口子渡嘉慶年間募置有業年租九石今將此款分撥添設沙埂場義
渡

牟樹溪渡距沙埂場十里由施姓四美祠捐銀生息並募置田業年租二
石作爲渡費

楊家灘渡距永峯場十二里募置有業年收租穀三石錢十餘貫

犁淵子渡近永峯場里人凌道文捐業勸辦年收租穀三石錢十貫

新橋渡道光二十九年里人劉子榮梁子元捐買田土作渡夫費用

白銀渡初名白糖鋪口卽筍溪河江口入江碼頭道光二十一年戴高奎

秦丹桂捐銀置業設立

墨斗沱渡乾隆五十四年劉相昭募置田業設立年久水冲業失其半道

光二十五年復由江濟川捐銀買田補足用費并畫款添設荔枝灘義渡
船一

五福場上下渡在縣東百二十里楊爲城捐置田業二作費又橫江渡有
船一費由存德堂出詳食貨志公產

金銀峽渡有土地塋田業支給渡用

賈嗣場渡有田業名渡田

奔溪渡在縣東九十里勅自清嘉慶年間置有田業其不足之數在賈嗣
場義渡項下分撥並勸募石壁沱中壩捐蓄山草變賣補充之

荔枝壩渡在縣東八十五里謝杜氏捐銀勅設後復募款置業二
二郎灘渡有渡田年租五石

江津縣志

卷十四

慈善

十三

上渡口渡有渡田年租三石

石膏灘渡置有渡田年租 石

救生船 清乾隆年間奉文設救生船三黃石龍大磯腦共船一滅虎磧

觀音背共船一石牛欄蜂窩子共船一隨水大小移救共水手十八名月
給工食由地丁內扣出每名銀六兩今廢

龍門灘水漲最險遠來柁工常瀕于危道光年間鄭颺捐貲鑄豎鐵桅標
示避者得吉後被船折壞經張有順潘致順李豐泰等募捐易以木桅每
年夏間仍立灘上其餘貲置買田土設救生船一

光緒年間邑令趙湘捐銀六百兩商號生息設救生船一分別大小水擇
險駐泊現歸收支所管理將原款儲蓄銀行仰息設柁工一月支工食錢

四貫水手一月支工食錢三貫大水添雇水手一

又邑令周學銘稟准川東道將道署舊船一改爲邑中救生船擇險駐泊
今廢

五福鎮朱沱場由眾募集捐款設救生船一

救生會 十全鎮太平場由眾募置產業年收租穀十五石作爲會費令
民船救生每救一人給獎多寡以水之大小爲差等

養濟院 乾隆年間邑中設孤貧九名每名月給食銀三錢由解款畫領
道光十一年邑令郭彬圖同紳募捐增置經費於東門外建修房院額設
男女孤貧八十名分住并記

記云於戲天之所矜人之所憫而無可如何者非此無告之民哉人情

江津縣志

卷十四

慈善

三

有所大不忍則必竭吾力以安之人力所不能獨致則必合眾力以成
之凡事類然而於我國家惠養窮黎之道尤不可不加之意焉江津地
廣人稠無告之民不一而足而稽考養濟院舊制祇收養孤貧九人下
車之初心焉歎之卽欲倡義捐貲增益其數自維德薄蒞任日淺未敢
重累我民惟捐俸添養之二年以來私心爲之稍慰然一人之惠非所
以示大公一時之圖非所以計長久也夫川東爲全蜀門戶江津又居
重慶上游貧民不安卽富民不靖富民不靖匪獨牧民之憂抑亦非都
人士之福也余兩載於茲竊見邑中富而好義者正不乏人爰集紳耆
共勸義舉首捐銀五百兩以爲之倡各紳耆亦卽踊躍樂輸浹旬之間
捐銀至四千有奇益以各寺僧陸續捐助共得銀六千餘兩適值余復

任後遴陳茂才光贊董其事以銀六百一十六兩營造兩廂房舍二十八間分住男女俾無雜處之嫌以四千四百八十兩買李金堂王諦錫田產二契歲收租銀二百兩更餘銀一千兩發質庫生息歲得子銀百二十兩以爲孤貧養資又將院前園地出賃歲收佃錢二千以備修葺房舍之費嗣是增收孤貧男婦共八十人定以爲額額缺則以後至者補之一時貿貿然來幸得所焉嗟夫井田不復三代後所以養民者區區賴有此耳若並此而不講焉窮民其靡遺矣吾儕身膺民牧縱不能大有造於民而顧此鰥鰥小惠亦不能勝任愉快其於我國家惠養窮民之意何哉今幸此事之告竣且喜都人士之能相與有成也爰敘顛末以爲之記

江津縣志

卷十四

慈善

古

同治十二年邑令陳賡續勸捐置業添設孤貧十名均由縣署戶房經管十三年閩邑紳糧始稟准交濟倉局管理未幾交三費局遞管光緒三十二年官紳清釐帳項規定額租由此歲養孤貧一百有五名

民國成立三費局并入收支所養濟卽由收支所管理三四兩年歲養孤貧一百六十名每名月給制錢四百七年從新規定孤貧介紹書責成保人以杜朦弊改發實足銅圓立案永遵八年又將郭令原存質庫轉發三費局生息本銀千兩收還另儲生息准備推廣九年清釐產業規復額租始合并銀息收入照原額增加四十名歲共養二百名每名月給實足銅圓五百十年復增加四十名歲共養二百四十名每名月給實足銅圓七百產業存款詳食貨志

又鄆公趾於乾隆十八年捐買高堽鋪田產一分收養孤貧男女十二名
買宅臨江門外居住立案永作養濟嘉慶三年公趾子三重因舊宅傾圮
又買宅西門外移住女孤貧咸豐庚申年爲禦賊計將臨江門外男院撤
去移住西門女院內每名月給口食後由鄆祠首人經營給發數傳始廢
光緒三十二年縣屬五福鎮雙河場由眾集捐建設養濟房院收養孤貧
男女今廢

恤孤所 道光十四年鍾珍等買城內新街子張家巷內房屋棲宿丐者
每年冬月初起翌年二月底止其費由紳糧募捐購備炭灰每夜散給後
併入養病所經理

及幼所 同治八年邑民胡開泰自捨田業一分始修院與養濟院相近
江津縣志 卷十四 慈善 五
程令倡捐增修房舍並孤幼口食費九年六月被水傾圮十年周令倡捐
修復至十三年共養孤幼四十二名今廢

養病所 光緒九年邑中募捐買城內大河溝地基建設爲收養貧病起
見嗣經邑紳程德音等集議每契稅價銀百兩附加養病錢一百作爲常
費由三費局經收輪交本城五坊監保管理所中凡醫生司役藥料飯食
均備無論本地異籍貧病無親者卽收入愈後出所有取締規條備案

樂善堂 光緒十四年就城內字聖廟設立內辦養病育嬰兩項經費卽
以隨契附加之養病費改充後復由邑令何鍾相稟准每契稅銀百兩附
加經費一錢藉資推廣共收育男女嬰一百名每嬰雇一乳母哺至三歲
始以一媪撫五嬰給嬰飯食衣履及撫媪工食達六歲無收領者男則延

師課讀送學生理女則延老媪教習女紅成人遣嫁完事至施送方脈與養痾所辦法略同惟只延請良醫二人每日按時診病隨到隨診診後發施藥票一飭其自取不能留堂此外助宣講施牛痘經理恤孤所等事亦極周至

教養工廠 民國三年邑中奉文籌設由收支所撥款舉士紳一人辦理內立織布樓竹木各藝科延聘教師由鎮鄉保送貧民子弟肄習爲彼生活計殊六年軍興多損失師徒四散有死亡者遂停辦餘貨拍賣其銀由收支所送銀行生息儲備恢復

貧民苦力病院 民國七年邑紳江懋祿等以養痾善舉久未恢復軍興之後病疫漸作貧民多無力醫治議由縣設立病院將隨契附加養痾費

江津縣志

卷十四

慈善

十六

一項撥用立案由收支所領給惟此款尙在儲蓄俟稍充足卽行開辦
紅十字分會 民國八年江懋祿李成章等約同志三十餘人各捐基金隨函申解中國紅十字總會轉由陸軍部立案假江姓春暉祠爲會所
貧民無利借貸局 同善社社員好慈善嘗集合資本設局定章許貧民覓保人承借整借零還不取息一時小質便焉

按太史公傳游俠謂緩急人所時有而以中材涉亂世之末流爲可矜甫詩朱門酒肉臭路有凍死骨何言之沈痛矣夫以均員顛方趾之倫而令其貧富苦樂相懸如天壤無援之者豈不悲哉無怪乎持社會主義者之得以行其說風靡一時也陳義雖高取徑雖殊要自有意惜非晚近所能耳無已志此告世之好行其德者焉